

I Sulat Febe Pol di dad To Ftoo di ku Dyisas di Ifisu

1 ¹Do, Pol, gumdà i sulat ani, satu dek Krayst Dyisas mdà di knayè i Dwata. Na febegu i sulat ani di gamu dad to nfun Dwata mnè di Ifisu, dunan i dad to gsalig du mdà di ta ksatatuyu ku Krayst Dyisas. ²Yé kayègu moon Dwata Màm na i Amuto Dyisas Krayst mlé gamu kafye na ktanak nawa.

I kafye gfunto fagu di ksatatuto di ku Krayst

³Fasalamat ato di Dwata, i Màm Amuto Dyisas Krayst, du blén di gito mdà di langit i kdee gamfye di kaftooto du mdà di ta ksatatuto ku Krayst. ⁴Di laman là mimò i klamang banwe, ta sanan ato nalék du nfunan ato fagu di ksatatuto di ku Krayst du fye too ato tluh, na landè gumaslento di kanfen.

Na mdà di kalbong nawan gito, ⁵ta falan fnè di fandaman i kafbalingan gito dad ngàan fagu di ku Dyisas Krayst du yé gulehewan na knayèan. ⁶Na tooto dnayen i Dwata du tadèan ato banlé kafye fagun di ku Dyisas Krayst, i Ngàan toon kanbong nawa. ⁷Fagu di litè Krayst, ta nsò Dwata ato, na ta fnasinsyan dad salàto. Too bong kafye Dwata ⁸i ta blén gito, landè gamsngad dun.

Di kdee kfulungan na kgadèan, ⁹nimò Dwata i ta fnaleh nawan, na fiten di gito i knayèan nimò fagu di ku Krayst i là lmenan fgadè di munan. ¹⁰Ani fnaleh nawan i dnohòn ku ta kel i du, dunan sansatun i kdee ta nimòan di langit na di tah tanà, na Krayst ulu di kdee.

¹¹I kdee fnaleh nawan, slame mgimòan. Na ta nalék Dwata ato du fye nimòan ato dad ngàan fagu di ksatatuto di ku Dyisas Krayst, du yé ta fnaleh nawan mdà di kagatbùan. ¹²Dunan ayé i nimòan. Taman, gami ta muna smalig di ku Krayst, toomi dnayen i kdatah Dwata.

¹³Na lê salngad ayé gamu dad to ise Dyu du ta lê gamu mbaling dad to Dwata. Di kaklingeyu i glut tdò, dunan i Fye Tulen mlé gamu kagalwà,

ta fantooyu. Na yé ilè dun gamu ta nfun Dwata du ta blén di gamu i Mtiu Tulus, dunan i ta fakangan. ¹⁴Du yé funa blé Dwata di gito i Tulusan, yé gugmadèto dun gdawatto kadang i kdee fakang Dwata di dad ton, na fagu déé gadèto too sikof kafalwà Dwata i dad nfunan. Taman, tooto dnayen i kdatahan.

I dasal Pol

¹⁵Yé duenam man, mdà di muna kaklingegu gablà di kaftooyu di Amuto Dyisas na i kalbong nawayu di kdee dad to nfun Dwata, ¹⁶là ti fanak agu fasalamat di Dwata gablà di gamu, na galta gamu fakuf di kat kdasalgu. ¹⁷Na mni agu di Dwata i Amuto Dyisas Krayst, dunan i Mào too mdatah. Ani fnigu, blén di gamu i Mtiu Tulus, dunan i mlé gamu kfulung na faglabat gamu i Dwata du fye midul i kdilèyu dun. ¹⁸Na lègu fni lanwan i fandamyu fye glabatyu nun fandenyu mdà di katlon gamu, dunan i kdee kafye ta fakangan di kdee dad to ftoo di ku Dyisas. ¹⁹Na yé duen-gu lê mni ayé du fye galyaloyu kgis i kaltulus Dwata lamyak di gito dad to ftoo di kenen. I kaltulus ta dini di gito, dunan ²⁰i gnamitan di ktékan ku Krayst di fati na di kafsudengan kenen di kwananan ditù di langit. ²¹Mdatah Krayst di kdee hari, na di dad ganlal, na di dad tulus^a, na di dad amu, na di kdee dagit, ise ku lo di mdu ani, bay kel di fulé du kadang. ²²Na ta fdanà Dwata i kalbong kdee di ku Krayst, na ta fagotan dun i kdee, na kenen ulu i kdee dad to ftoo. ²³Na gito dad to ftoo di ku Dyisas Krayst, ta mgimò lawehan, na déé gumite dun i ksikofan, na kenen smikof kalbong kdee.

I ktékto di fati magin ku Krayst

2 ¹Di munan, salngad gamu di dad to ta mati du landè kasgagotyu di Dwata mdà di ksasèyu, na di dad salàyu. ²Gamsalà gamu di munan du lalòyu ldam i dad to nfun banwe ani. Yé nimenyu Satanas, dunan i magot di bleng i langit na i tanà, na lê magot i dad to là mimen di Dwata. ³Na di munan, salngad i kdeeto di dale, du yé nimòto knayè i ungad, na nimento i ibalan na i sasè fandaman. Na salngad ato di dademe dad to là mimen di Dwata, mnè tahto i kalbut Dwata.

⁴Bay mdà di kakdo Dwata na i kalbong nawan gito, ⁵di lamto mnè di fati du mdà di là kimento, ta ntékan ato magin ku Krayst. Du yé duenyu galwà lo mdà di kafye Dwata. ⁶Na mdà di ta ksatatuto ku Krayst Dyisas, ta nték Dwata ato magin di kenen, na ta fsudengan ato di saféd Krayst di langit. ⁷Nimòan ayé du fiten kel di landè sen i too bong kafyen ta fgadèan di gito fagu di ku Krayst Dyisas. ⁸Du mdà di kafye Dwata ta galwà gamu fagu di kaftooyu, na ise ku mdà di gamu nimò bay tadè blé

^a 1:21 I dad tulus, dunan dad kasaligan i Dwata na i dad busaw.

Dwata di gamu. ⁹Na yé duenam man, landè to fakay fdatah i kton, du ise ku yé gumdà i kagalwàto di balù dét i ta mgimòto. ¹⁰Ta fnalami Dwata ato, na di ta ksatuto di ku Krayst Dyisas, nimòan ato i dad to mimò i fye nimò ta fala fatlagad Dwata.

I ksatuto fagu di ku Dyisas Krayst

¹¹Gamu dad to ise Dyu, fandamyu i muna kagkahyu. Msik dad Dyu gamu, na yé katlola gamu “dad landè ilè di laweh.” Bay dale, nun fimòla ilè di lawehla. ¹²Na fandamyu i kagkahyu di munan, du gawag gamu di ku Krayst, na là glam gamu di dad Dyu ta mgalék Dwata, na landè alelyu di kasafnè ta fakang Dwata di dad ton. Na di knèyu di tah tanà ani, fa landè fandyu, na là ti gadèyu i Dwata. ¹³Bay balù tagnè gamu gawag di Dwata, di nawan ani, mdà di ksatuyu ku Krayst Dyisas, ta neben gamu di kenen fagu di litè faloh Krayst di kfatin.

¹⁴Na Krayst samfye i dad Dyu na i dad ise Dyu du ta sansatun i lwe lumbuk ani. Na ta falmon i gambleng gito, dunan gumdà i kasnang nawa dad Dyu na i dad ise Dyu. ¹⁵Du yé nimò Krayst di kfatin, flandèan btas i dad uldin Dwata fagun di ku Mosis gagin i dad fimòan na i dad fnangan di dad to. Nimòan ayé du sansatun i lwe lumbuk di satu falami lumbuk mdà di ta ksatuto di ku Krayst, na sanfyen ato. ¹⁶Fagu di kfati Krayst di krus, lanmon i kasnang nawa, na sansatun i lwe lumbuk, na sanfyen ale di Dwata. ¹⁷Du Krayst, tamdò kenen di dad Dyu, dunan i dad to mdadong di Dwata, na lêan tdò i dad ise Dyu, dunan i dad to mawag di Dwata. Na yé tdòan i kdeela nun kasafye. ¹⁸Du mdà di ku Krayst i kdee dad to, baling Dyu ku demen ise Dyu, fakay gafdadong di Mà fagu di Mtiu Tulus.

¹⁹Na yé duenam man, ta ise gamu mahal to, bay ta glam gamu di dad to nfun Dwata, na ta ngà gamu i Dwata. ²⁰Na i kdee ta ftoò di ku Krayst, salngad i gumnè ta fdak i dad tugad Dwata na i dad to dek Dyisas, na Krayst Dyisas i too mabtas batu gufdak i gumnè ani. ²¹Na fagu di ku Krayst, ta sagot i gumnè ani, na ta mgimò i gumnè Dwata too mtuu. ²²Na fagu di ksatuyu di ku Dyisas Krayst, ta lê gamu sasatu di kdee ta ftoò du mgimò i gumnè Dwata, du yé ta mnè di gamu i Tulusan.

I katdò Pol di dad to ise Dyu

3 ¹Yé duenam man, do, Pol, i satu blanggù mdà di katdògu gamu dad to ise Dyu gablà di ku Krayst Dyisas. ²Na gadègu sa ta lingeyu gablà di kafye Dwata di do, du blén i nimò ani di do du gamfye di gamu. ³Na fite Dwata di do i là lmenan fgadè di munan, salngad i ta man-gu di gamu fagu di sulat. ⁴Ku bnasayu i sulatgu ani, glabaty i là lmenan fgadè Dwata di munan gablà di ku Krayst. ⁵Di munan, là tulenan ani di dad to, bay ani ta fgadèan fagu di Mtiu Tulus, na fgafatan di dad to dek Dyisas Krayst na di dad tugad Dwata. ⁶Na dunan ani i là lmenan fgadè di

munan, gamu i dad to ise Dyu, fagu di Fye Tulen, lê gamu gaging di dad Dyu di kagfunla i blé Dwata, na sagin i kdee di satu laweh, na slame nun ael di fakang Dwata fagu di ku Krayst Dyisas.

⁷Mdà di kafye Dwata, ta nimòan agu snaligan tamdò i Fye Tulen mdà di gnagan ta blén do fagu di kaltulusan. ⁸Na balù ku too agu mdanà di kdee dad to nfun Dwata, knèan ta blé Dwata di do i gnagan tamdò di dad to ise Dyu gablà di too bong kafye blé Krayst di gito. ⁹Na lêan blé di do i gnagan fbateng di kdee dad to i tdò là lmenan fgdè di munan. I Dwata mimò i kalbong kdee, là tayòan tulen i tdò ani di munan. ¹⁰Yé duen Dwata mimò ani du fye teen i dad ganlal na i dad tulus ditù di langit i kdee dad sahal gnaganan fagu di kdee dad to ftoo di ku Dyisas. ¹¹I nimò Dwata ayé saglalò di ta fnaleh nawan di là fa nimòan i kdee, na dnòhòan ayé fagu di ku Krayst Dyisas, i Amuto. ¹²Na mdà di ksatuto di ku Krayst, na fagu di kaftooto di kenen, là gdè ato, na là myà ato fdadong di Dwata. ¹³Taman, ani fnigu di gamu, nangyu fagdanà i nawayu du mdà di dad kaflayamgu di katdògu gamu, du i dad kaflayam ani gamfye di gamu.

I kalbong nawa Krayst gito

¹⁴Taman, yé duen-gu lkuad di Mào di langit dmasal di kenen. ¹⁵Kenen gumangmà i kdee dad to ftoo ta ditù di langit, na lê man dini fa di tah tanà. ¹⁶Na ani fnigu di Dwata, mdà di bong kdatahan banlén gamu kgis fagu di Tulusan, du fye mbagal i nawayu. ¹⁷Ani lêgu fni, too mnè Krayst di nawayu fagu di kaftooyu. Na lêgu fni too gamu dmalil na lamnok fagu di kalbong nawan gamu, ¹⁸du fye glabatyu i kalbong nawa Krayst gamu salngad di kdee dad to i Dwata. ¹⁹Mulà moon galyaloyu i kalbong nawa Krayst gamu balù là sikof kaglabatto dun, du fye too gamu fnò i ldam Dwata.

²⁰Dnayento Dwata du fagu di kaltulusan gaganan nimò mdatah fa di fnito na di fandamto. ²¹Gito i dad to ftoo di ku Krayst, tooto dnayen i Dwata fagu di ksatuto di ku Krayst Dyisas mdà di muna, na kel ani, na gafat di landè sen. Amén.

I ksatatu nawa i dad to ftoo di ku Krayst

4 ¹Yé duen-gu blanggù du mdà di kagin-gu di nimò i Amuto. Taman, ani fnigu di gamu, fanyeyu ldamyu du yé gten nimò i dad to mgalék Dwata. ²Tooyu fdanà i ktoy, na too gamu sakdo, na tooyu fantahà nawayu. Na mdà di kasalbong nawayu, too gamu sfasinsya. ³Too gamu fgal di ksatatu nawa blé i Mtiu Tulus fagu di kasafye gumdà i kasbakas nawayu. ⁴Du gito dad to ftoo di ku Dyisas, lo satu laweh guglamto, na lo satu Tulus mnè di gito. Na mdà di kalék Dwata gito, ta lo satu fandento. ⁵Na lo satu Amuto, na lo satu fantooto, na lo satu duento fbunyang. ⁶Na lo

satu Dwata, dunan Mà i kdeeto, na kenen mdatah di kdee, na mnè kenen di kdeeto, na nimòan i knayèan fagu di kdeeto.

⁷Na kat satu di gito, ta banlé Krayst dad sahal gnagan nimò mdà di knayèan. ⁸Du ani man i Tnalù Dwata,

“Di kbatunan di langit, dee neben dad to gtafus, na blén i dad sahal gnagan di dad to.”

⁹Dét gumtatek i manan, “Mbatun kenen?” Yé kayèan man ta muna kenen tufa di tanà, na fles di gumngalaman. ¹⁰I ta tufa di gumngalaman, dunan i mbatun ditù di tah langit, du fye baling di dungan ku demen di tah, déé sa kenen. ¹¹Na kenen i mlé dad sahal gnagan nimò di dad to, na mdà ayé, nun dademe mgimò dad to dek Dwata, na i dademe tugad Dwata, na i dademe tamdò i Fye Tulen, na i dademe, ulu di dad to ftoo du tamdò ale di dad simbahan. ¹²Na yé duen Krayst mlé dad gnagan ani, du fye gatlagad i kdee dad to Dwata mimò i knayèan, na kamgis i laweh Krayst, dunan i dad to ftoo di kenen. ¹³Na fagu déé, ta nun ksatuto di kaftoo na di kgadèto i Ngà Dwata. Na du yé kagkah, ta mgimò ato mbagal di kaftooto, na sikof i ldamto salngad di ku Krayst.

¹⁴Na ku yé kagkahto, ta là ti salngad ato i dad malnak ngà mlal mgebe balù dét tdò i dad to fulung famgaw. ¹⁵Bay yé gito nimò, tmulen ato gagin i kaglut na kasakdo. Na fagu déé, too ato lamnok di kaftoo kel di kasalngadto di ku Krayst, dunan i Uluto. ¹⁶Na mdà di ku Krayst, i kdee dad to glam di lawehan, ta too sbakas, na ta sgagot i kabal laweh fagu di kat satu alel di laweh. Na ku kat satu, nimòan i kenen alel, too lamnok i laweh, na baling too midul i kbagalan fagu di kasakdo.

I falami to

¹⁷Na yé duenam man, fagu di dagit i Amuto, toogu man di gamu, ta nangu ganbet i dad to là ftoo di ku Krayst du landè gukel i fandamla. ¹⁸Na kmifuh i kaglabatla. Là gfunla i falami nawa blé Dwata du landè gnadèla na magéng ulula. ¹⁹Na landè kyàla, na mdà ayé, ta bléla i lawehla di sasè knibal i ungadla, na magin ale di kdee dad sahal magsik nimò. Na baling midul i kiballa mimò sasè.

²⁰Ise yé teenyu di ku Krayst. ²¹Bay ta lingeyu sa gablà di kenen, na di klalòyu kenen, ta gatdò di gamu i kaglut teen di ku Dyisas Krayst. ²²Taman, tngakyyu i labi ldamyyu, dunan i labi ktoyuu, du yé gamfalmo gamu du fibalan na fan-gawan gamu. ²³Na tooyu fafalami i ktoyuu na i fandamyyu. ²⁴Yé fye teen di gamu i falami kto nimò Dwata glalò di kenen kagkah du fye teen i katluhan na i ktiun.

²⁵Taman, ta nang gamu tmulen kéng. Yé fye, tulenyu kaglutuan di dademeyu ftoo, du i kdeeto glam di laweh Krayst. ²⁶Na ku malbut gamu, too gamu fgeye tàan gamu nebe di salà. Na lnifetyu i kalbutyyu ayé di laman là sdaf i du, ²⁷na nangu banlé Satanas kdalan fagsalà gamu.

²⁸I to tagnè tmaku, ta nang dè tmaku, bay yé fye, talbahò du yé fye kafngabalan i klawilan, na gtabengan i dad to landè knun.

²⁹Na nang gamu talù sasè, bay yé talùyu i fye du yé gamtabeng, na gamtgal nawa i dad to lminge gamu di balù dét klidùla. ³⁰Na nangyu flidù i Mtiu Tulus Dwata, du kenen ilè i ta kfun Dwata gamu, na i gugmadè dun snikofan i kagalwàyu kadang di fulè du. ³¹Na tnagakyu i katduk nawa, na i kalbut, na i kaflabè, na i kafaltê, na i kaslen, na i kdee dademe sasè nimò. ³²Fanyeyu i ldamyu di dademeyu to, na too gamu sakdo. Na too gamu sfasinsya salngad i ta kfasinsya Dwata i dad salàyu fagu di ku Krayst.

I knè di gumalwan

5 ¹Yé duenam man, tooyu ganbet i ldam Dwata du gamu i dad ngàan toon kando. ²Na too gamu sakdo salngad i kakdo Krayst gito di kablén i kton di fati du mgimò dsù too fye bun gamfye nawa Dwata.

³Na du ta ngà gamu i Dwata, là gtenan linge ku nun di gamu mimò sasè knayè i lawehyu, ku demen i dademe magsik nimò, ku demen i klom. ⁴Na là fakay ku yé lamwà di bàyu dad magsik talù, na dad talù landè gukel, na i dad ulek magsik, du là ti gtenan. Bay yé too gten ku mlé gamu fasalamat di Dwata. ⁵Du ta tooyu gadè, i to mimò sasè knayè i lawehan, na i to lom, landè gfunla di Kagot Krayst na di Kagot Dwata, du i to ayé salngad ku yé fnangamfùan i ise glut dwata.

⁶Nang gamu fagwè di sukat fagu di talù landè gukel, du i dad to mimò ayé, mnè tahla i kalbut Dwata du là nimenla dun. ⁷Taman, niwasyu i dad to ayé. ⁸Di munan, mnè gamu di gukmifuhan, bay ani ta mnè gamu di gumalwan fagu di ksasatuyu di Amuto, Dyisas Krayst. Taman, yé fye i ldamyu salngad di ldam i dad to mnè di gumalwan. ⁹Du yé ulè i knè di kalwa mimò fye, tluh, na kaglut. ¹⁰Na tooyu fkah di nawayu i kdee gamflehew i Amuto. ¹¹Na nang gamu magin di dad nimò landè gukel salngad di nimò i dad to mnè di gukmifuhan, bay yé nimòyu i tluh, du fye dilèla i dad sasè nimòla. ¹²(Du too ti magyà, balù di lo kastulen dun gablà di sasè nimòla di gugbunin.) ¹³Na ku ta magtuyal i kdee di lwa, yé klom mite i kaglut, ¹⁴du i lwa fiten i kdee. Taman, ani man i Tnalù Dwata, “Mukat ge, to kudang, na mték ge, to mati, du tnuyal Krayst ge.”

¹⁵Yé duenam man, tooyu fanye mebe i ktoy, na nangyu ganbet i dad to là fulung faldam, bay yé ganbetyu i dad to fulung faldam. ¹⁶Too gamu fagasleng mimò fye, du ta too midul ksasè di nawan ani. ¹⁷Na mdà déé, nangyu nimò i landè gukel, bay yé fye tooyu fanngabal ku dét knayè i Amu fimò gamu. ¹⁸Na nang gamu flangal du yé gamfalmo gamu, bay too gamu fafnò i Mtiu Tulus. ¹⁹Na ku stulen gamu, gnamityu i dad Salmo^b,

^b 5:19 Dunan i libru guglam i dad lingag dmayen di Dwata.

na i dademe man i Tnalù Dwata. Na too gamu lmingag mdà di nawayu i dad lingag dmayen di Amu. ²⁰Na kloyu to fasalamat di Dwata i Mào fagu di dagit i Amuto Dyisas Krayst, balù dét i mkel di gamu.

I flau di dad to nun yaan

²¹Na too gamu safdanà di kat satu, du yé ilè i kafèyu di ku Krayst.

²²Gamu dad libun nun yaan, fdanàyu i ktoy di yaanyu salngad i kafdanàyu di Amuto, Dyisas Krayst. ²³Du i lagi, kenen ulu i yaanan salngad ku Krayst, ulu i dad to ftoo, dunan i lawehan, na kenen falwa dale. ²⁴Na nè kafdanà i dad to ftoo di ku Krayst, salngad ayé moon kafdanà i dad libun di yaanla fagu di kdee dad nimòla.

²⁵Na gamu dad lagi nun yaan, kandoyu i yaanyu salngad di kakdo Krayst i dad to ftoo di kenen du blén i kton di fati mdà di gito. ²⁶Yé duenan fafati du yé dalanan tamluh gito di kafngen damyoh gito di éél fagu di Tnalùan, ²⁷du fye too gten i dad to ftoo di kenen, na mlaneb, na landè gumaslento di balù détan. ²⁸Na salngad ayé, gamu dad lagi, fye ku tooyu kando yaanyu salngad i gamu laweh, du i lagi kamdo i yaanan, ta lêan kando i kenen kto. ²⁹(Du landè to ku knangan i kton, bay yé nimòan fankaanan, na toon nifat. Na salngad ayé i kifat Krayst di dad to ftoo di kenen. ³⁰Du i kdeeto slame dad alel laweh Krayst.) ³¹Na ani sulat di Tnalù Dwata, manan, “Yé duen i lagi tmagak i mään na yèan, na satnù di yaanan, na i lwe dad to ayé ta mbaling ale satu.” ³²Too mngalam gumtatek i manan ayé, bay yé kaglabatgu dun, dunan i ksasatu Krayst di dad to ftoo di kenen. ³³Bay knèan, kat satu gamu dad lagi, là fakay ku là kandoyu i yaanyu salngad i kakdoyu i ktoy, na gamu dad libun, là fakay ku là nafèyu i yaanyu.

Dad flau di dad ngà na di dad tuala

6 ¹Dad ngà, nimenyu i dad tuayu du yé gten nimò i dad ngà ftoo di ku Krayst. ²Ani uldin di Tnalù Dwata, manan, “Nafèam i màm na yèam.” Di kdee dad uldin, yé i tnanin uldin nun fakang magin dun, du ani manan, ³“Ku nafèam dad tuam, too fye i knèam, na too tahà i lawilam dini di tah tanà.”

⁴Na gamu dad tua, nangyu nimò gufalbut i dad ngàyu, bay di kebeyu dale, falnauyu na tdòyu ale glalò di katdò i Amuto.

I dad flau di dad fasak na di dad amula

⁵Dad fasak, nimenyu i dad amuyu dini di tah tanà. Nang gamu smumal, bay tooyu ale nafè, na nimòyu i kdee mdà di nawayu, salngad i kimenyu di ku Krayst. ⁶Tooyu ale nimen. Na nang lo yé kafdufyu di nimòyu ku tnanulla gamu du ku yé nimòyu, lo yé nusalyu i kdagla gamu. Bay balù ku là teenla gamu, nimòyu i knayè Dwata mdà di nawayu,

salngad ku yé gufafasakyu di ku Krayst. ⁷Na yé duenam man, too gamu falngad mdà di nawayu du di Amuto i gumimòyu ani, ise ku lo di dad to. ⁸Du gadèyu banlé Amuto taden i kdee dad to mdà di dad fye nimòla, balù ku fasak ku demen ise.

⁹Na gamu dad amu, yé fye ku salngad kibòyu i dad fasakyu. Nangyu ale falnìkò du gadèyu lo satu sa i Amuyu di langit, na landè to nungulan.

I dad klung blé Dwata gito

¹⁰Na di gusenán, too gamu fbagal fagu di ksatatuyu di Amu, na di kaltulusan. ¹¹Sandulèyu lsak i kdee dad klung blé Dwata du fye gfisanyu Satanás di kdee galan kafgaw gamu. ¹²Du ise ku yé dademeto sfati i dademeto to, bay yé dademeto sfati i dad ulu i dad sasè tulus, dunan i dad busaw nun glal magot i gukmifuh i banwe ani, na dale gumdà i sasè nimò di tah tanà na di bleng i tanà na i langit. ¹³Yé duenam man, sandulèyu lsak i kdee dad klung blé Dwata du fye ku ta kel i bang i kdee sasè, gfisanyu kenen, na gaganyu tadag kel di gusen i kasfati.

¹⁴Taman, too gamu fatlagad, na fan-gatyu i galingyu, dunan i kaglután, na lê man anit, dunan i katluh. ¹⁵Na lsakyu talumfà, dunan i kafatlagadyu tamdò i Fye Tulen mlé kasgulè nawa i to gamsalà na i Dwata. ¹⁶Na i kaftooyu di ku Dyisas Krayst, yé klung nagotyu du klungyu di dad fanà dminè gal gtì Satanás. ¹⁷Na dnawatyu i kagalwà blé Dwata gamu du ani kalù tek ta sukub di uluyu. Na tooyu gnamit i Tnalù Dwata du ani sundang ta blé i Mtiu Tulus di gamu. ¹⁸Na di kdee ayé gine, too gamu dmasal mni tabeng di Dwata. Na balù dét mkel di gamu, too gamu dmasal fagu di kalak i Mtiu Tulus. Na too gamu fgeye, na nang gamu ftakas. Na tooyu dnasal i kdee dad to Dwata. ¹⁹Na lêyu agu beg dnasal du fye di katdògu, banlé Dwata agu glut tdò du fye nun klabègu tmulen i ta fgadèan gablà di Fye Tulen, dunan i là fa tayòan fgadè di munan. ²⁰Yé duen Dwata mdek do du tdògu i Fye Tulen, na yé duen-gu gablanggù ani. Taman, begyu agu dnasal du fye landè klikògu tmulen dun, du yé gten nimògu.

Gusen i sulat

²¹Yé tmulen gamu gablà di kagkahgu na di nimògu dini Tikiku, i satu flanekto too mabtás na gsalig di nimò i Amuto. ²²Taman, ani duen-gu mdek kenen salu déé di gamu du tulenan gamu i kagkahmi dini, na tangalan i nawayu.

²³E dad flanekgu, mulà moon i Mào Dwata na i Amuto Dyisas Krayst mlé gamu ktanak, na kalbong nawa, na kaftoo di kenen. ²⁴Mulà moon banlé Dwata kafye i kdee dad to kambong nawa i Amuto Dyisas Krayst kel di landè sen.